

清光緒朝中日交涉史料

卷卅五之卷卅六
二十一年

清光緒朝中日交涉史料卷卅五

(二七五一) 翰林院侍講樊恭煦奏和議難特請飭守將嚴防要隘以固畿疆摺

光緒二十一年二月初九日

日講起居注官記名道府翰林院侍講臣樊恭煦跪奏爲和議難特戰備未可稍疏請旨飭下守將嚴防要隘以固畿疆恭摺仰祈聖鑒事比因倭寇日深姑從款議朝廷特遣李鴻章爲全權大臣東出行成此誠萬不得已之舉然臣竊揣夷情狡詐上年十二月張蔭桓二大臣之往旣已受給於前李鴻章此行恐亦未能操必和之券且聞各國新聞紙所傳多云倭欲無厭償費而外割地爲先是蓋窺我急求息事之心故爲狂悖難行之說竊恐多方以誤我必欲我民心不固軍心漸懈遷延坐誤防守浸疏而彼乃突肆狡謀蓄銳養精以圖一逞臣策倭夷情勢必不顧瞻和議而暫緩窺伺之心伏查津沽一隅密邇畿輔威旅旣失門戶洞開其迤北山海關樂亭一帶有劉坤一大軍駐守兵力不爲不厚其餘津北之劉家河甜水河等處津南之埕子口歧口等處若敵艦撲犯處處可以登岸以形勢衝要而論則津北之守尤重於津南蓋倭人迭次攻取均先由後路抄入也日來朝寄指揮俾曹克忠爲津南游擊之師并簡調聶士成回紮蘆台津北一方亦屹然重鎮矣臣竊謂防軍之弊約有數端責

成不專則彼此得相推諉事權不一則調遣難期應手心志不齊則聲勢無由聯絡訓練不勤則臨變不能鎮定一軍力戰後無繼進一處受敵旁無應援此皆兵家之大忌且山海關至津沽南北相距地勢錦長處處設防兵力既單策應尤屬不易擬請以榆關至大沽量地遠近分爲三路劉坤一爲北路聶士成爲中路曹克忠爲南路各專責成於要害之地派營駐守仍另選精兵亦分三路爲各軍游擊之師除劉坤一有節制各軍之權責成不患不專事權不患不一其聶士成曹克忠兩路擬請飭下署北洋大臣王文韶宣示朝廷德意開誠布公予以重權俾各選同心合志得力之將聯爲一氣其守將之不足恃者准其商請更換以期易怯爲勇化分爲合並於中路南路各海口相度形勢扼要布置務須聲勢聯絡互相策應仍各時勤操練到處偵探刻刻如臨大敵不得稍涉懈弛庶各口防守嚴密卽和議不能速成而我軍能守能戰敵人無隙可乘畿疆固若金湯自無意外之虞矣臣愚昧之見是否有當伏乞皇上聖鑒謹奏光緒二十一年二月初九日

(二七五一) 附件一 樊恭煦奏董福祥謀勇兼優請令駐紮樂亭灤州等處以防敵

再臣聞提督董福祥程文炳二軍日內移駐馬頭河西務等處仰見朝廷慎固京畿之意誠備禦不虞之要圖也惟臣聞董福祥忠勇敢戰此次奉命入衛每扼腕太息深以不當前敵爲愧如令程文炳一軍駐紮近畿一帶而量移董福祥一軍於樂亭灤州等處扼要駐紮專當敵人內犯必由之路似於防務較有裨益該提督威鎮西陲敵人聞名生憚其駐京時操練極勤部下士卒不但精壯且有紀律並聞其到京後早經派人於關內外察看形勢故凡險要之處瞭然於胸此真謀勇兼優之將才若使駐紮敵人內犯必經之要路足消倭奴覬覦之心擬請皇上飭下督辦軍務王大臣迅速妥議施行謹附片具陳伏乞聖鑒謹奏

(二七五二) 貴州道監察御史鄭思賀奏請申諭內外大臣籌捐軍餉共濟時艱摺

光緒二十一年二月初九日

掌貴州道監察御史臣鄭思賀跪奏爲軍餉孔急擬令大臣速籌捐助共濟時艱恭摺仰祈聖鑒事竊維毀家紓難楚稱子文輸財助邊漢有卜式急公好義千古傳爲美談伏見用兵以來需餉浩繁籌借籌捐久形支絀而中外大臣未聞有竭力報効如古其人者夫時事艱難之會正天良激發之時其或世受國恩久膺疆寄卽捐頂糜踵當亦義所難辭若使量力

輸將上以分宵旰之憂下以效涓埃之助諒諸大臣無不樂爲籌措者也就臣平日所聞如熱河都統崇禮都統恩佑吏部侍郎崇光兩廣總督李瀚章開缺四川總督劉秉璋江西巡撫德馨等身處脂膏皆能自潤此外席豐履厚坐擁鉅貲猶復不少可否請旨申諭內外大臣家資素豐者量爲捐助或一二十萬兩或四五十萬兩統歸接濟軍餉並懇仿照大臣捐田贍族之例賞給御書匾額對聯以示獎勵如有以空言塞責甘心欺飾者一經別人指摘定卽予以嚴譴如此則上不虧國體下不累民生於籌備餉儲亦有裨益臣管見所及恭摺具陳伏乞皇上聖鑒謹奏光緒二十一年二月初九日

（二七五三）軍機處呈遞樊恭煦等摺片奏片

光緒二十一年二月初九日
洋務檔

本日樊恭煦奏和議難恃戰備未可稍疏摺又奏請飭董福祥一軍駐紮樂亭灤州等處片均奉旨存又奏參曾廣鈞片鄭思賀奏參吳學顏李永芳片分繕寄信諭旨二道鄭思賀奏擬令大臣捐助軍餉摺又奏迅解豐陞阿來京治罪片均奉旨存又奏徐州歸德兩鎮多盜請速捕治片遵繕寄信諭旨一道謹將各摺片恭呈慈覽謹奏二月初九日

(二七五四)山東巡撫李秉衡來電

光緒二十一年二月初九日到
電報檔

初七日由驛具奏收復甯海文登兩城並聲明威海劉公島尙多踞賊麓島口初村一帶多挖地濠等情拜摺後續據探報榮成賊已盡退威海賊衆已載兩輪北渡并毀壞威海礮臺現威海賊已將盡惟劉公島澳內有倭船二十餘隻揆賊情勢恐將趨重北路呈子口一帶最關緊要李占椿等各軍自應先其所急飭赴呈子口以厚兵力衡與劉坤一往返電商意見相同已由劉坤一具奏除飭孫萬林等軍趕緊收復榮成威海外請代奏秉衡謹肅奏

(二七五五)幫辦軍務四川提督宋慶來電一

光緒二十一年二月初九日到
電報檔

倭寇自去冬至今盤踞海蓋窺伺營口冀通錦州之路慶竭力堵遏未能逞志今鳳凰城大股由東路出大高嶺之西逼近遼陽情形萬緊且牛莊西通錦州雖有各湘軍防勒而兵力甚單恐難抵禦倘擾及錦州運道既斷糧餉不濟則東征之師不能自立大局更難措手昨求轉奏請旨自率各軍北顧遼陽併防西路現在情形錦防重於營口祈速示遵大局幸甚
宋慶叩齊未

(二七五六) 幫辦軍務四川提督宋慶來電二

光緒二十一年二月初九日到
電報檔

倭寇今日由牛莊竄田莊臺慶已率全軍回勦兼顧竄錦州之路乞代奏慶叩佳

(二七五七) 幫辦軍務四川提督宋慶來電三

光緒二十一年二月初九日到
電報檔

頃聞田莊臺萬急當率各軍回援已電總署代奏昨午牛莊失守湘楚各軍挫潰據民人飛報倭大股向田莊臺而來僅離四五十里旋接吳大澂來書囑卽分隊來援慶思牛莊各軍既已潰回若僅派數營斷不能支而全隊拔回營口亦不能保即使徒防營口指日冰解水陸受敵且後路運道一斷糧彈不濟亦難支持今後路被擾惟有全隊回顧今晚各隊可以到齊沿途泥水大深稍爲整頓仍卽向北路進勦北援遼瀋西防錦州竭力籌辦吳大澂因雙臺子後路尤爲吃重已先帶隊馳往防禦所有擅自離防北援緣由乞請旨治罪祈代奏宋慶佳

(二七五八) 署直隸總督王文韶來電

光緒二十一年二月初九日到
電報檔

初九日電諭旨祇悉津沽南北兩路防務逐日三令五申嚴加戒備並懸重賞激勵士卒挖

濠設探無計不施頃據劉含芳電稟榮成歲海賊退惟劉公島尙有賊其爲併力關外抑竟注意關內均未可知津沽南路兵力總單刻已電商劉坤一飛調援東之李占椿等十五營由沿海馳赴祁呈兩口間與曹克忠一軍互相策應整備截擊庶期周密

(二七五九) 吉林將軍順來電

光緒二十一年二月初九日到
電報據

總署督辦軍務處裕帥劉大帥吳帥宋帥鈞鑒發電後卽據署遼陽州徐慶璋迭函告急倭由大坎赴雞王崆直趨遼陽乞回援長順遂令距海廿里英城子甘泉鋪各隊速暫退紮距倭三股每股一二千由東山繞出直撲勢甚兇猛我軍分頭迎敵相持一晝夜豫軍被圍丁春喜礮斃賊二三百賊退其時千山一帶均有賊蹤又聞依克唐阿拔隊回遼我軍勢孤長順遂整隊而進據報鞍山站北沿河子南賊已回竄適又奉旨移紮要隘助守等因欽此現在長順已將各隊開拔沙河子首山堡等處依克唐阿亦已回援嚴密布置大六兒堡一帶各通藩大道距遼較遠難以兼顧請旨飭下劉坤一吳大澂速派李光久徐邦道帶隊移紮以固省防護請代奏長順虞

(二七六〇)軍機處電寄王文韶劉坤一諭旨

光緒二十一年二月初九日
電寄檔

奉旨王文韶電奏已悉津沽沿海防務雖已布置粗定惟既有倭船將向大沽西南猛攻之
諸亟應豫爲戒備且敵情詭譎或聲東擊西或分路撲犯均未可定著王文韶與劉坤一隨
時關照分飭各營勤加偵探整備截擊勿致顧此失彼欽此二月初九日

(二七六一)軍機處電寄龔照璦諭旨

光緒二十一年二月初九日
電寄檔

奉旨龔照璦電悉義國願助中國款議英使已屢言之可亦致國電一分英國電著龔照璦
親遞法義兩電可分派參贊同時齎遞以期迅速欽此二月初九日

(二七六二)辦理天津團練事宜王文錦奏報移營扼要進紮並添僱土夫摺

光緒二十一年二月初八日

辦理天津團練事宜臣王文錦臣曹克忠臣張夢元臣鄧啓元跪奏爲恭報移營扼要進紮
恭摺仰祈聖鑒事竊自威海失守以後天津各處海口日夜戒嚴臣等以小站地方與各處
海口相距猶爲稍遠由臣克忠往查地勢擬分四營駐紮祁口又分八營駐紮上古林該處

距祁口四十餘里自統十八營駐紮新開路雙井一帶該處距大沽二十餘里距上古林不足二十里彼此聯絡聲氣易通惟移營必先築壘刻下兵勇每日訓練若復令其服役土工勢難操演現又將屆開河防務倍形吃緊臣等未敢拘泥特僱土夫自二月初一日興工每日或五六百名或八九百名不等相度地勢指示規模各營遠近向背之形皆令互相照顧所有窪下之處亦一律墊平壘必堅厚濠必寬深足資戰守惟分布卽遠郵傳宜密查前自天津至小站行營節節設立撥遞今復添設至祁口一帶以期消息靈通調動迅速除咨戶部兵部立案外所有臣等軍營進紮各處及添僱土夫緣由謹合詞恭摺具陳伏乞皇上聖鑒謹奏光緒二十一年二月初十日奉硃批該部知道欽此

(二七六三) 吏科掌印給事中余聯沅奏大局難支請飭樞臣妥籌善策摺

光緒二十一年二月初十日

吏科掌印給事中臣余聯沅跪奏爲和不易成戰不能勝守不足恃大局難支宜如何竭力維持請旨飭樞臣破除成見妥籌善策以期挽救於萬一恭摺仰祈聖鑒事竊維禦倭之方不外戰守和三策自肇衅以來所謂戰守和者無一可恃至今猶觀望游移坐待海融冰泮

任倭人長驅直入而不顧此誠天下臣民之至憤而微臣所夙夜兢兢不敢遽言而不忍不言又不得不痛哭以言之者也方倭事之起也徵兵於四方調餉無虛日乃失地喪師相率而潰逃揆其債事之由以無統之故迨朝命授劉坤一爲欽差大臣俾三軍一其心志各將有所統率似戰事確有把握矣然而善言戰者必先言守北洋各海口縣亘數千里平坦者易登岸疏防者恐闖入而朝命又派王文韶爲幫辦北洋大臣密伺而察其所爲卽合謀而匡其不逮似守禦亦臻鞏固矣又恐戰不能勝而守不足恃乃僥倖下策而出於和在朝廷本不得已之苦衷而樞臣竟以爲無復加之至計於是乎請旨派王文韶署理直隸總督卽召李鴻章星夜來京旣還職以寵其行復溫諭以結其心似和議可操左券矣然而和者兩相敦睦之謂也豈有彼方厲兵而遽肯納款者乎况張蔭桓邵友濂旣已受侮於前矣若令李鴻章覘顏再往果能化干戈爲玉帛卽不足洗前日之差或暫可紓目前之急亦不得謂爲計之左也然而李鴻章之往也樞臣必以爲和之易成而臣則慮其和之難就何也李鴻章旣無韓琦范仲淹之威重足以懾服乎西夏又無裴度李德裕之才能足以控制夫強鄰徒以脂韋結納暱就外洋卽予以全權要挾者無厭便宜者難從倘不能如富弼之力爭卽不克如蘇武之完節召侮貽羞莫此爲甚臣非意在阻和特恐我欲和而彼不肯和彼之和

非我所能和李鴻章不又爲張蔭桓邵友濂之續乎是一誤再誤將不止貽笑於四國也此則戰守不可懈而尤不可不急籌也不劉坤一王文韶之責而誰責乎是二臣者爲朝廷所倚重卽天下臣民所仰望者也爲劉坤一計必將聯各軍爲一氣合彼己而洞悉簡材勇以任使運全局於胸中以諸葛亮集思廣益之心爲韓信戰勝攻取之效爲王文韶計必將力破除夫瞻徇嚴汰革夫庸懦親巡歷夫海口急密籌夫守備以劉鄩十步九計之智爲李光弼壁壘一新之謀乃聞劉坤一頓兵於關門而毫無振作王文韶株守夫天津而仍無布置是戰守皆無可恃而朝議竟不能不出於和夫和果有把握豈不甚善乃本此以爲挾制其心固不可測倘藉此以爲延宕其事更不可靠不知樞臣亦曾否計及和如不成而壹意求和是徒懈我將士之心是益墮彼緩兵之計於此非亟求戰守之策不可求戰守之策非專責劉坤一王文韶不可相應請旨飭下軍機大臣卽諭令劉坤一王文韶以和爲權宜之計而戰守乃急切之圖萬不可因言和而遽懈戰守亦不得因籌戰守而有礙於和務使劉坤一通檄關內外各軍預防攻勦以戰爲守毋得懈弛王文韶速飭津南北各海口嚴密堵禦以守爲戰毋得疏虞倘戰不力守不固惟該大臣是問如此卽和不能成亦不必急與講和堅忍相持不過三月倭之餉盡力疲將俯首求款而不可得矣豈非能戰守而後可言和舍

戰守而卽難以自立也哉此臣所以兼權戰守和三策而不能不披瀝以陳之者也愚昧之見是否有當伏乞皇上聖鑒謹奏光緒二十一年二月初十日

(二七六三) 附件一 余聯沅奏參陳湜長順片

再聶士成扼守大高嶺屢獲勝仗倭賊不能越嶺一步屹然爲奉天長城自該提督奉調入關留守之兵太單陳湜一軍屢經奉旨催令前往填紮而節節逗遛竟不知現抵何所竊以大高嶺爲奉天門戶遼陽告警三家子吉峒峪均已爲賊占據倘大高嶺有失則奉天亦岌岌可危陳湜如此情形是其顯違詔旨畏縮不前貽誤戎機實非淺鮮相應請旨飭將陳湜撤退交部嚴議另派得力之將如魏光燾或唐仁廉接統該軍迅紮要隘以遏賊奔竄之路聞依克唐阿往援遼陽而長順推諉不去遼陽屏蔽奉天一旦不保則大高嶺之勢孤而奉天愈可危應請旨飭該將軍奮力協勦毋得稍有疏虞至長順應如何降旨嚴飭之處恭候聖裁謹附片具陳伏乞聖鑒謹奏

(二七六三) 附件二 余聯沅奏丁汝昌等死情可疑請飭李秉衡確查片

再聞劉公島失後倭人將丁汝昌等五置並兵民四千餘人送至煙台鎮遠鐵甲以及魚雷各艦共九隻均爲倭擄去夫兵敗死綏苛求之似近於刻矣然如此情節支離而臣不能無疑焉對壘於驚濤駭浪之中肉薄於槍林彈雨之下或顛於水或斃於礮衆人耳目所屬必確有所見乃諸將之死未奏其因何而陣亡此其可疑者一也丁汝昌畏葸成性雖不能奮勇殺賊豈不知乘隙逃遁况自坐鎮遠並輔以魚雷各艇若潰圍疾走亦可以冒險而出乃以狡詐無行之人而株待馬革裹尸之慘此其可疑者二也古人敗衄之餘至手無寸兵並士卒傷亡殆盡或陷陣而捐軀或刎頸而報國還屍歸元昭然共覩未聞有船械完全而不毀兵卒衆多而不傷主將駢死於舟中蓋棺從容於敵國此其可疑者三也有此多疑未敢深信竊恐其勢窮力屈以船爲贊拱手降敵而敵遂借送棺以愚我賈鼎不得而知水濱亦無從問恐事平之後阿附之徒必有爲該員等邀恩請卹者此而不察其真僞必致貽笑於四方相應請旨飭下李秉衡確切查明覆奏以昭核實尤可異者同一海軍也大東溝之戰有漢納根之指麾遂毀倭船多隻而敵人爲之破膽劉公島之失以丁汝昌之恒怯遂致全軍覆沒而水師毀於一旦此其憤軍誤國一死不足以蔽辜而况共死猶在疑似之間並不得謂其已死而恕之也謹附片直陳伏乞聖鑒謹奏

(二七六四)軍機處呈遞余聯沅摺片奏片

光緒二十一年二月初十日
洋務檔

本日余聯沅奏請飭妥籌善策摺又奏參陳提畏縮不前並請嚴飭長順協勒片均奉旨存
又奏丁汝昌等陣亡情節可疑請飭李秉衡確查片遵繕寄信諭旨一道謹將摺片三件恭
呈慈覽謹奏二月初十日

(二七六五)幫辦軍務湖南巡撫吳大澂來電

光緒二十一年二月初十日
電報檔

昨早臣大澂率隊出田莊台數里探知倭逆已過大房身有直撲田莊台之勢臣僅率衛隊
二三百名斷難冒險前進沿途敗兵絡繹並遇李光久魏光燾並所部各將官受傷甚重見
之惻然因令各軍散勇均至雙台子歸集隊伍臣今早行抵雙台子電告宋慶會合各軍駐
守田莊台以顧營口臣酌調數營親駐雙台子遏牛莊西竄之路臣吳大澂謹奏乞代奏蒸

(二七六六)軍機處寄山東巡撫李秉衡上諭

光緒二十一年二月初十日
洋務檔

軍機大臣字寄山東巡撫李光緒二十一年二月初十日奉上諭有人奏聞劉公島失後倭

人將丁汝昌等五艦並兵民四千餘人送至烟臺鐵甲魚雷各艦均爲倭擄情節支離未敢深信請旨飭查等語丁汝昌等死事情形李秉衡相距較近見聞必確卽著詳細查明據實具奏原片著鈔給閱看將此由四百里諭令知之欽此遵旨寄信前來

(二七六七)軍機處電寄李鴻章諭旨

光緒二十一年二月初十日
電寄檔

奉旨美使接日本覆電云敕書底稿均已妥協須於中歷二月二十一日行抵長門再訂晤期等語李鴻章所雇商輪計卽可到著早日放洋總以二十以前到彼爲要行期定後卽電奏欽此二月初十日

(二七六八)軍機處電寄劉坤一諭旨

光緒二十一年二月初十日
電寄檔

奉旨王文韶李秉衡電奏均悉榮城威海之賊均已盡退勢將北犯津沽南路兵力尙單王文韶等已電商劉坤一調援東之李占椿萬本華張國林等十五營由沿海馳赴祁口埕子口一帶以厚兵力卽著李秉衡催令各軍迅速前進剋日到防與曹克忠一軍聯絡策應力顧津南之防免致疏虞丁槐一軍能否一併調赴直隸以助防勦並著劉坤一等酌量辦理

欽此二月初十日

(二七六九)軍機處電寄宋慶吳大澂諭旨

光緒二十一年二月初十日
電寄檔

奉旨宋慶吳大澂電均悉賊撲牛莊湘軍潰退現在營口已危尤須緊防西竄錦州宋慶率全軍回顧西路是此時第一要著著與吳大澂督飭各軍盡力堵遏遼瀋之防猶有各統帥分任錦州之防實惟宋慶吳大澂專責務須同心合力保此一路不得空言敷衍致誤大局懷之慎之欽此二月初十日

(二七七〇)軍機處電寄長順依克唐阿諭旨

光緒二十一年二月初十日
電寄檔

奉旨長順電奏已將各隊開拔沙河子首山堡等處依克唐阿亦已回遼嚴密布置等語現在長順依克唐阿兩軍均已回顧遼城兵力較厚著即聯絡聲勢激厲士卒同心協力共保危城兼防分股北竄之路是爲至要欽此二月初十日

(二七七二)欽差大臣兩江總督劉坤一奏報布置山海關內外及東西兩路防務情